

## GUTUN@K ▶

## Oiangu publikoa eta bizirik!

Udako etenaren ondoren, Oiangu Publikoa eta Bizirik plataformak Oianguren Aisiguneko proiektuaren aurkako ekimenak antolatzen jarraituko du. Gogora dezagun, proiektu hori pasa den otsailean Ordiziako Udalak onartu zuela herritarrei informazioa eman eta iritzirik eskatu gabe. Orduan hartutako erabakia eurek sustatzen omen duten politikaren aurka doa erabat, udalak denbora baitarama herritarrei sinistarazi nahian jarritzen duen politikak partaide-tza eta ingurumenarekiko begirunea sustatzen dituela, *partaidetzan* oinarrituta dagoen Plan Estrategikoa garrantuz eta Tokiko Agenda 21eko konpromisoak sinatuz, horien artean, interesa duten herritar eta talde guztiak informatzea eta erabakietan parte hartzea aukerka ematearena dagoelarik.

Proiektuaren aurkako jarrrera berretsiz, Plataforma honek, beste behin, honelako kasuetan herritarren informatu eta parte hartzeko bideak eskaintzearen garrantziaz ohartarazi nahi ditu Ordiziako Udala eta herritarren. Gai honen harira, hainbat espazio eta parke publikotan eman diren partaide-tza prozesuak ezagutarazteko asmoz, eta baita prozesu horiek espazio horien egituraketan izan duten eraginaz hausnarketa egitearren ere, Oiangu Publikoa eta Bizirik plataformak hitzaldi bat antolatu du: *Proyecto Oiangu: !!!Participación Ciudadana!!!* izenburupean (gaztelaniaz). Berau datorren ostegunean, urriaren 20an, arratsaldeko 19:00etan, Ordiziako Barrena Kultur Etxean izango da eta bertara ordiziarrak zein goierritarrak gonbidatu nahi ditugu. Hizlariak Jesús Rubio soziologoa eta Donostiako Haritzalde natur taldeko kidea, eta César San Juan, Euskal Herriko Unibertsitateko, Ingurumen Psikologiako irakaslea izango dira.

EDURNE HUESA ▶ OIANGU PUBLIKOA  
ETA BIZIRIK PLATAFORMA. ORDIZIA

## iragarki laburrak ▶

## ANIMALIAK

Salgai. Bi pottoka eme salgai ditut. 680 76 80 79.

## IRITZIA ▶ IBAN ARREGI (BERTAKO HEDABIDEETAKO ARDURADUNA)

## Euskarazko prentsaren sektorearen eskaera

**E**uskarazko prentsaren sektoreak eskaera garbia egin dio Eusko Jaurlaritzari, lehengo astelehenean Donostian egindako agerraldiaren bidez —eskaeraren egileen artean dira HITZA denak—: batetik, 2006rako euskarazko prentsaren tza Eusko Jaurlaritzako aurrekontuetan milioi bat euroko hazkundea izatea, eta, bestetik, diru laguntzen zenbatekoa urtearen lehen sei hilabetekoan jakin eta ordaintzeko modua egitea.

Izan ere, Jaurlaritzaren Kultura Sailaren aurrekontuetan 2000tik 2005a arte ez da atal horretan hazkunderik izan, nahiz eta euskarazko prentsan aurrerapausoak eta proiektu berriak sortu diren azken bost urteotan. Horra hor *Berria*-ren sorrera eta honek *Egunkaria*-rekiko izan duen hazkundea, hor astegunkariaren sorrera, eta hor HITZA proiektuaren sorrera eta honek gaur egun daukan dimentsioa.

Hain zuzen, gaur sei HITZA daude: Tolosaldean eta Leitzaldean, Oarsoaldean, Lea-Artibai eta Mutrikun, Urola Kostan, Goierri eta Donostian. Kontuak kontu, HITZA denek egunero ia 50.000 ale banatzen dituzte, 52 orrialde daukate, hamar egoitza, bost webgunek, aldizkari bat, HITZetako erredakzioan 60 bat langile daude, bestela beste 140 bat (banatzaileak, komertzialak), HITZek aste osoa okupatzen dute, urte osoa, hainbat kanpo zerbitzu erabiltzen dituzte... Eta abenduan, zazpi garren HITZA sortuko da: Busturialdean.

Beraz, azkenaldian euskarazko prentsak eman dituen aurrerapausoekin, esan dezakegu: sektorea, proiektu eta produktu aldetik, behin ere baino indartsuago dago.

Baina indartsuago egon behar du, euskaldunontzat komunikabide erreferentzia-

lak euskarazkoak izateko eta komunikabideok geure hizkuntzaren normalizazioan eraginkorrakoak izateko. Horretarako, jakina, sektoreko enpresa edo elkarte bakoitzak kalitateko zerbitzua eman behar die euskaldunei, eta diru iturriak handitu egin behar ditu (publizitatearen eta harpidetzaren bidez). Baina gaur egun, oraindik, erakunde publikoen erantzukizuna ere erabakigarria da.

Euska Biziberritzeko Plan Nagusia (EBPN) 1998an onartu zuten Gasteizko Legebiltzarrean, eta planaren «helburu nagusia, euskaraz bizi nahi duten herritarrei horretarako aukerka bermatzeko behar diren hizkuntza-politikako neurriak erabakitzea eta bultzatzea da. Euskal Herrian, maila pertsonalean, sozialean eta ofizialean, euskararen berreskurapen osoa lortzeko euskararen aldeko urratsak areagotzea».

Eta komunikabideen alorrari, teoriarik, garrantzi handia ematen dio EBPNk: «Komunikabideen garrantzia gero eta handiagoa denez, euskarazko komunikabideak hizkuntza-normalizazioaren arlo estrategikotzat jo behar ditu administrazioak». EBPNren hirugarren ardatz estrategikoa dio euskarazko komunikabideek «lehentasun altua» dutela eta «toki mailako euskarazko komunikabideak sustatu eta landu» egin behar direla.

1998tik euskarazko prentsak aurrera egin du, batik bat toki mailakoak, baina 2000tik Kultura Sailean sektoreko aurrekontua ez da igo. Kultura Saila ez da errealitate berrira egokitu; ez du pausoa eman aurrera. Segitu du diru laguntzak ematen —hain artean, HITZA bakoitzari—, baina diru poltsa handitu gabe eta dirua elkarte gehiagoren artean banatuta.

EBPNk berak 1998an zioen «euskarazko prentsa erdarazkoaren mendekoa» dela. Egoera hori aldatzen ari da, gure ustez batez ere tokiko egunkariak dauden lekuetan, baina oro har jauzia ematen hasi nahi bada, ezinbestekoa da erakunde publikoek sektore hau benetan estrategikotzat jozea.

Gainera, euskarazko prentsak lehen diru askorik ez eta beti, gainera, itolarria izan ohi du bere ordainketak egin ahal izateko ere. Besteak beste, Eusko Jaurlaritza diru laguntzan asko atzeratzen delako. Urtearen hamargarren hilabetean gaude eta euskarazko komunikabideek oraindik ez dakite zenbateko laguntza emango dien Jaurlaritzak, ezta noiz jasoko duten ere. Urteroko kontua da hori.

EAEko 2005eko diru laguntza deialdia maiatzean egin zuen Jaurlaritzak, enpresek eta elkarteek hilabeteko epea eduki zuten proiektuak aurkezteko, baina oraindik ez dakite euren egitasmoak diruz lagunduko dituzten, ezta zenbat eta noiz jasoko duten ere.

Jaurlaritzaren laguntzak garrantzitsuak izan ohi dira HITZetan ere (aurrekontuaren %8-10), baina beranduegi iristen dira. Eta horrek arazoak sortzen dizkie euskarazko prentsakoei: maileguak eskatu behar, dirua aurreratuz, ezin inbertsiorik egin, gastuei aurre egin behar (soldadak, inprimategia, banaketa...) eta abar.

Euskarazko prentsak ezin du beti horrela bizi. Horregatik eskatu dio Eusko Jaurlaritzari gehiago inplikatzeko.

Oharra: Bertako Hedabideak enpresa HITZA guztietan bazkide da.

## IRUDI ZAHARRA ▶



EKEI KULTURWEB

## Legazpiko dantzariak XX. mendearen hasieran, sueltoan dantzan

Maiatzaren 3ko ezpata-dantza berreskuratu zela 30 urte betetzen direla eta, ospakizun berezia egingo dute Legazpin. Datorren urtean izango da Ezpata Dantza Eguna. Goiz Deia eta Sustraiak taldeek bultzatu dute ekimena. Angel Muruak GOIERRIKO HITZARI utzitako ar-

gazki hau XX. mende hasierakoa da, gordetzen den Legazpiko dantzarien argazki zaharrenetakoa. Ezpata Dantzako kideak Fandangoa eta Arin-Arima dantzatzen ari dira irudian. Urteen joanari eutsi dion tradizioa bilakatu da.